

# ॥ तैत्तिरीय संहिता ॥

॥ चतुर्थः प्रश्नः ॥

॥ तैत्तिरीयसंहितायां षष्ठमकाण्डे चतुर्थः प्रश्नः ॥

य॒ज्ञेन॒ वै प्र॒जाप॑तिः प्र॒जा अ॑सृजत् ता उ॑पय॒ङ्गिरे॒वासृ॑जत्  
यदु॑पय॒जं उ॑पय॒जति॑ प्र॒जा ए॒व तद्य॑ज॒मानः॑ सृजते  
जघ॑ना॒र्धाद॑व॒ द्यति॑ जघ॑ना॒र्धाद्धि॑ प्र॒जाः प्र॒जाय॑न्ते स्थवि॒म॒तो-  
ऽव॑ द्यति॒ स्थवि॒म॒तो हि॑ प्र॒जाः प्र॒जाय॑न्तेऽस॒म्भि॒न्द॒न्न॑व॒ द्यति॑  
प्रा॒णाना॑मस॒म्भेदा॑य॒ न पर्या॑व॒र्तय॑ति यत्प॑र्याव॒र्तये॑दुदाव॒र्तः  
प्र॒जा ग्रा॑हु॒कः स्या॑त्समु॒द्रं ग॑च्छ॒ स्वाहे॑त्या॒ह रे॑तः॥१॥

ए॒व तद्द॑धात्य॒न्तरि॑क्षं गच्छ॒ स्वाहे॑त्या॒हान्तरि॑क्षेणै॒वास्मै॑  
प्र॒जाः प्र॒ ज॑नयत्य॒न्तरि॑क्ष॒ः ह्यनु॑ प्र॒जाः प्र॒जाय॑न्ते दे॒वः  
स॑वि॒तारं॑ गच्छ॒ स्वाहे॑त्या॒ह स॑वि॒तृप्र॑सूत ए॒वास्मै॑ प्र॒जाः प्र॒  
ज॑नयत्य॒होरा॑त्रे गच्छ॒ स्वाहे॑त्या॒हाहोरा॑त्राभ्या॒मे॒वास्मै॑ प्र॒जाः  
प्र॒ ज॑नयत्य॒होरा॑त्रे ह्यनु॑ प्र॒जाः प्र॒जाय॑न्ते मि॒त्रावरु॑णौ गच्छ॒  
स्वाहा॑॥२॥

इ॒त्या॒ह प्र॒जास्वे॒व प्र॒जाता॑सु प्रा॒णापा॑नौ द॑धाति॒ सोमं॑ गच्छ॒  
स्वाहे॑त्या॒ह सौ॒म्या हि॑ दे॒वता॑या प्र॒जा य॒ज्ञं ग॑च्छ॒ स्वाहे॑त्या॒ह

प्रजा एव यज्ञियाः करोति छन्दांसि गच्छ स्वाहेत्याह  
 पशवो वै छन्दांसि पशून्वाव रुद्धे द्यावापृथिवी गच्छ  
 स्वाहेत्याह प्रजा एव प्रजाता द्यावापृथिवीभ्यामुभयतः परि  
 गृह्णाति नभः॥३॥

दिव्यं गच्छ स्वाहेत्याह प्रजाभ्यं एव प्रजाताभ्यो वृष्टिं  
 नि यच्छत्यग्निं वैश्वानरं गच्छ स्वाहेत्याह प्रजा एव  
 प्रजाता अस्यां प्रतिं षापयति प्राणानां वा एषोऽव द्यति  
 योऽव द्यति गुदस्य मनो मे हार्दि यच्छेत्याह प्राणानेव  
 यथास्थानमुप ह्वयते पशोर्वा आलब्धस्य हृदयं शुगच्छति  
 सा हृदयशूलम्॥४॥

अभि समेति यत्पृथिव्यां हृदयशूलमुद्वासयेत्पृथिवीं  
 शुचार्पयेद्यदप्स्वपः शुचार्पयेच्छुष्कस्य चार्द्रस्य च  
 संधावुद्वासयत्युभयस्य शान्त्यै यं द्विष्यात्तं ध्यायेच्छुचैवैनमर्पयति

रेतो मित्रावरुणौ गच्छ स्वाहा नभो हृदयशूलन्द्वात्रिंशच्च॥१॥ [१]

देवा वै यज्ञमाग्नीध्रे व्यभजन्त ततो यदत्यशिष्यत  
 तदब्रुवन्वसंतु नु न इदमिति तद्वसतीवरीणां वसतीवरित्वम्  
 तस्मिन्प्रातर्न समशक्नुवन्तदप्सु प्रावेशयन्ता वसतीवरीरभवन्वस

य॒ज्ञो वै व॑सती॒वरी॑र्य॒ज्ञमे॒वारभ्य॑ गृही॒त्वोप॑ वसति॒ यस्या॑गृही॒ता  
अ॒भि नि॒म्रोचे॒दना॑र॒ब्धोऽस्य॑ य॒ज्ञः स्या॑त्॥६॥

य॒ज्ञं वि च्छि॑न्धा॒ज्योति॑ष्या॒ वा गृ॒हीया॒द्विर॑ण्यं वाव॒धाय॑  
सशु॑क्राणामे॒व गृ॒ह्णाति॒ यो वा॑ ब्रा॒ह्म॒णो बहु॑या॒जी  
तस्य॑ कु॒म्भ्या॑नां गृ॒हीया॒थ्स हि गृ॒हीत॑व॒सती॒वरी॑को  
वसती॒वरी॑र्गृ॒ह्णाति॒ प॒शवो॑ वै व॑सती॒वरीः॑ प॒शूने॒वारभ्य॑  
गृही॒त्वोप॑ वसति॒ यद॑न्वी॒पं तिष्ठ॑न्गृ॒हीयान्नि॒र्मार्ग॑का  
अ॒स्मात्प॒शवः॑ स्युः प्रती॒पं तिष्ठ॑न्गृ॒ह्णाति॒ प्रति॒रुध्यै॒वास्मै॑  
प॒शून्गृ॒ह्णातीन्द्रः॑॥७॥

वृ॒त्रम॑ह॒न्त्सो ३ ऽपो ३ ऽभ्य॑म्रियत॒ तासां॑ यन्मे॒ध्यं  
य॒ज्ञिय॑ स॒दे॒वमा॑सीत्तदत्य॑मुच्यत॒ ता वह॑न्ती॒रभव॑न्वह॑न्तीनां  
गृ॒ह्णाति॒ या ए॒व मे॒ध्या य॒ज्ञियाः॑ स॒दे॒वा आप॑स्तासा॒मेव गृ॒ह्णाति॒  
नान्त॑मा वह॑न्ती॒रती॑याद्यद॑न्त॒मा वह॑न्ती॒रती॑याद्य॒ज्ञमति॑ मन्येत॒  
न स्था॑व॒राणां॑ गृ॒हीया॒द्वरु॑णगृही॒ता वै स्था॑व॒रा यथ॑स्था॑व॒राणां॑  
गृ॒हीयात्॑॥८॥

वरु॑णेनास्य य॒ज्ञं ग्रा॑हयेद्यद्वै दि॒वा भव॑त्य॒पो रात्रिः॑ प्र  
वि॑शति॒ तस्मा॑त्ता॒म्रा आपो॑ दि॒वा दद॑श्चे॒ यन्न॑क्त॒म्भव॑त्य॒पोऽहः॑ प्र

विंशति॑ तस्माच्चन्द्रा॑ आपो॑ नक्तं॑ ददृश्रे छायायै॑ चातपंतश्च॑ संधौ॑  
 गृह्णात्यहोरात्रयोरे॒वास्मै॑ वर्णं॑ गृह्णाति॑ ह॒विष्मंतीरि॒मा आप॑  
 इत्या॑ह ह॒विष्कृतानामे॒व गृह्णाति॑ ह॒विष्मा॑ ९ अस्तु॥ ९॥

सूर्य॑ इत्या॑ह सशुक्राणामे॒व गृह्णात्यनुष्टुभां॑ गृह्णाति॑ वाग्वा  
 अनुष्टुग्वाचै॒वैनाः॑ सर्व॒या गृह्णाति॑ चतु॑ष्पद॒यर्चा गृह्णाति॑  
 त्रिः॑ सादयति॑ सप्त॒ सम्पद्यन्ते॑ सप्तप॑दा शक्करी॒ पशवः॑  
 शक्करी॑ प॒शूने॒वाव॑ रुन्दे॒ऽस्मै वै लो॒काय॑ गा॒र्हपत्य॑ आ  
 धी॒यते॒ऽमुष्मा॑ आह॒वनीयो॑ यद्गा॒र्हपत्य॑ उपसा॒दये॑दस्मि॒ल्लोके॑  
 प॑शुमा॒न्थस्या॒द्यदा॑ह॒वनीये॒ऽमुष्मिन्॑॥ १०॥

लो॒के प॑शुमा॒न्थस्या॒दुभयो॒रुप॑ सादयत्युभयो॒रे॒वैनं॑ लो॒कयोः॑  
 पशु॑मन्तं॑ करोति॑ सर्व॒तः परि॑ हरति॒ रक्ष॑साम॒पह॑त्या  
 इन्द्रा॑ग्नि॒योर्भा॑ग॒धेयीः॑ स्थे॒त्याह॑ यथा॒यजुरे॒वैतदा॑ग्नी॒ध्रं  
 उप॑ वासयत्ये॒तद्वै य॒ज्ञस्याप॑राजितं॒ यदा॑ग्नी॒ध्रं यदे॒व  
 य॒ज्ञस्याप॑राजितं॒ तदे॒वैना॒ उप॑ वासयति॒ यतः॑ खलु॒ वै  
 य॒ज्ञस्य॑ वि॒तंत॑स्य॒ न क्रि॑यते॒ तदनु॑ य॒ज्ञं रक्षा॑स्य॒व  
 चर॑न्ति॒ यद्वह॑न्तीनां॒ गृह्णाति॑ क्रि॒यमाण॑मे॒व तद्य॒ज्ञस्य॑ शये॒  
 रक्ष॑साम॒नन्व॑व॒चाराय॑ न ह्ये॒ता ई॒लय॑न्त्या॒ तृती॑यस॒वनात्परि॑

शेरे य॒ज्ञस्य॒ संत॑त्यै॥११॥

स्यादिन्द्रो गृहीयादस्त्वमुष्मिन्क्रियते षड्विंशतिश्च॥२॥ [२]

ब्र॒ह्म॒वा॒दि॒नो॑ वदन्ति॒ स त्वा॑ अ॒ध्व॒र्युः॑ स्या॒द्यः॑  
सोम॑मु॒पाव॒हर॒न्त्सर्वा॑भ्यो दे॒वता॑भ्य उ॒पाव॒हरे॒दिति॑ ह॒दे  
त्वेत्या॑ह मनु॒ष्ये॑भ्य ए॒वैतेन॑ करोति॒ मन॑से॒ त्वेत्या॑ह पि॒तृभ्य॑  
ए॒वैतेन॑ करोति दि॒वे त्वा॒ सूर्या॑य॒ त्वेत्या॑ह दे॒वेभ्य॑ ए॒वैतेन॑  
करोत्ये॒ताव॑ती॒र्वै दे॒वता॑स्ताभ्य॑ ए॒वैन॑ सर्वा॑भ्य उ॒पाव॑हरति  
पु॒रा वा॒चः॥१२॥

प्र॒व॒दि॒तोः प्रा॑तरनु॒वाक॑मु॒पाक॑रोति॒ याव॑त्ये॒व वा॒क्ताम॑व  
रु॒द्धेऽपोऽग्ने॑ऽभि॒व्याह॑रति॒ य॒ज्ञो वा॑ आपो॑ य॒ज्ञमे॒वाभि॑  
वाचं॒ वि सृ॑जति॒ सर्वा॑णि॒ छन्दा॑स्यन्वा॒ह प॑शवो॒ वै  
छन्दा॑सि॒ प॒शूने॒वाव॑ रु॒द्धे गा॒यत्रि॒या तेज॑स्का॒मस्य॑  
परि॑ दध्यात्रि॒ष्टुभेन्द्रि॒यका॑मस्य॒ जग॑त्या॒ प॒शुका॑मस्यानु॒ष्टुभा॑  
प्रति॒ष्ठाका॑मस्य॒ प॒ङ्क्त्या॑ य॒ज्ञका॑मस्य॒ वि॒राजा॑न्न॒काम॑स्य  
शृ॒णोत्व॒ग्निः स॒मिधा॑ हवम्॥१३॥

म॒ इत्या॑ह सवि॒तृप्र॑सूत ए॒व दे॒वता॑भ्यो नि॒वेद्या॑पोऽ॒च्छैत्य॑प  
इ॒ष्य हो॒त॒रित्या॑हेषि॒तं हि॑ कर्म॒ क्रिय॑ते॒ मैत्रा॑वरुणस्य

चमसाध्वर्यवा द्रवेत्याह मित्रावरुणौ वा अपां नेतारौ  
ताभ्यामेवैना अच्छैति देवीरापो अपां नपादित्याहाहुत्यैवैना  
निष्क्रीय गृह्णात्यथो हविष्कृतानामेवाभिघृतानां गृह्णाति॥१४॥

कार्ष्णिर्सीत्याह शमलमेवासामपं प्लावयति समुद्रस्य  
वोक्षित्या उन्नय इत्याह तस्मादद्यमानाः पीयमाना  
आपो न क्षीयन्ते योनिर्वै यज्ञस्य चात्वालं यज्ञो  
वसतीवरीर्होतृचमसं च मैत्रावरुणचमसं च सःस्पर्श्य  
वसतीवरीर्व्यानयति यज्ञस्य सयोनित्वायाथो स्वादेवैना  
योनेः प्र जनयत्यध्वर्योऽवैरपा (३) इत्याहोतेमनन्नमुरुतेमाः  
पश्येति वावैतदाह यद्यग्निष्टोमो जुहोति यद्युक्थ्यः परिधौ  
नि माँष्टि यद्यतिरात्रो यजुर्वदन्प्र पद्यते यज्ञक्रतूनां  
व्यावृत्त्यै॥१५॥

वाचो हवमभिघृतानां गृह्णात्युत पञ्चविंशतिश्च॥३॥ [३]

देवस्य त्वा सवितुः प्रसव इति ग्रावाणमा दत्ते प्रसूत्या  
अश्विनोर्बाहुभ्यामित्याहाश्विनौ हि देवानामध्वर्यू आस्ताम्  
पूष्णो हस्ताभ्यामित्याह यत्यै पशवो वै सोमो व्यान  
उपांशुसवनो यदुपांशुसवनमभि मिमीते व्यानमेव पशुषु

दधातीन्द्राय॒ त्वेन्द्राय॒ त्वेति॑ मिमीत॒ इन्द्राय॒ हि सोमं॑  
आह्रियते॒ पञ्च॑ कृत्वो॒ यजुषा॑ मिमीते॥१६॥

पञ्चाक्षरा॑ पङ्क्तिः॒ पाङ्क्तो॑ यज्ञो॒ यज्ञमे॒वाव॑ रुन्दे  
पञ्च॒ कृत्वस्तूष्णी॑न्दश॒ सम्पद्य॑न्ते दशाक्षरा॑ विराडन्नं  
विराड्विराजै॒वान्नाद्य॑मव॑ रुन्दे श्वा॒त्राः स्थं॑ वृ॒त्रतु॑र॒ इत्या॑हैष  
वा अ॒पा॒ सोम॑पीथो॒ य एवं॑ वेद॒ नाप्स्वार्ति॑माच्छति॒ यत्ते॑  
सोम॒ दिवि॒ ज्योति॑रित्या॒हैभ्य॑ ए॒वैन॑म्॥१७॥

लो॒केभ्यः॑ सम्भ॑रति॒ सोमो॑ वै राजा॒ दिशो॑ऽभ्यध्याय॒त्स  
दिशो॑ऽनु॒ प्रावि॑शत्प्रागपा॒गुद॑गध॒रागि॑त्या॒ह दिग्भ्य॑ ए॒वैन॑  
सम्भ॑रत्यथो॒ दिशं॑ ए॒वास्मा॑ अ॒व रु॑न्देऽम्ब॒ नि ष्व॑रेत्या॒ह  
कामु॑का ए॒नः स्त्रियो॑ भवन्ति॒ य एवं॑ वेद॒ यत्ते॑ सो॒मादा॑भ्यं  
नाम॒ जागृ॑वीति॥१८॥

आ॒हैष॑ वै सोम॑स्य सोम॑पीथो॒ य एवं॑ वेद॒ न  
सौ॒म्यामा॑र्ति॒माच्छ॑ति॒ घ्नन्ति॒ वा ए॒तत्सो॑मं॒ यद॑भिषुण्वन्त्य॒ः शून॑पं  
गृह्णा॑ति॒ त्राय॑त ए॒वैनं॑ प्रा॒णा वा अ॒श्वः प॒शवः॑ सोमो॒-  
ऽशू॑न्पुन॒रपि॑ सृजति प्रा॒णाने॒व प॒शुषु॑ दधाति॒ द्वौद्वा॒वपि॑  
सृज॑ति॒ तस्मा॑द्द्वौद्वा॑ प्रा॒णाः॥१९॥

यजुषा मिमीत एनं जागृवीति चतुश्चत्वारिंशच्च॥४॥ [४]

प्रा॒णो वा ए॒ष यदु॑पा॒ः शु॒र्यदु॑पा॒ः श्व॒ग्रा ग्र॒हा गृ॒ह्यन्ते॑  
प्रा॒णमे॒वानु॒ प्र य॑न्त्य॒रु॒णो ह॑ स्मा॒हौप॑वेशिः प्रा॒तःस॒व॒न ए॒वाहं  
य॒ज्ञः स॑ऽस्था॒पयामि॒ तेन॒ ततः॑ स॑ऽस्थि॒तेन॑ च॒रामी॒त्यष्टौ  
कृ॒त्वोऽग्ने॑ऽभि पु॒णोत्य॑ष्टाक्ष॒रा गा॒य॒त्री गा॒य॒त्रम्प्रा॑तःस॒व॒नम्  
प्रा॑तःस॒व॒नमे॒व तेना॑प्रो॒त्येका॑द॒श कृ॒त्वो द्वि॒तीय॑मेका॑द॒शाक्ष॒रा  
त्रि॒ष्टुप्त्रै॑ष्टु॒भ॒म्माध्यं॑दिनम्॥२०॥

स॒व॒न॒म्माध्यं॑दिनमे॒व स॒व॒नं तेना॑प्रो॒ति द्वा॑द॒श  
कृ॒त्वस्त्वृ॑तीय॒द्वा॑द॒शाक्ष॒रा जग॑ती॒ जाग॑तं तृ॒तीय॑स॒व॒नन्तृ॑तीयस॒व॒न  
तेना॑प्रो॒त्येता॑ः ह॒ वाव॒ स य॒ज्ञस्य॒ स॑ऽस्थि॒तिमु॒वाचा॑स्क॒न्दाया॑स्क  
हि तद्य॒द्यज्ञ॑स्य॒ स॑ऽस्थि॒तस्य॒ स्क॒न्दत्य॑थो ख॒ल्वाहु॑र्गा॒य॒त्री  
वाव॒ प्रा॑तःस॒व॒ने ना॒ति॒वाद् इत्य॑न॒ति॒वा॒दुक् ए॒न॒म्प्रा॑तृ॒व्यो  
भव॑ति॒ य ए॒वं वे॒द् तस्मा॑द॒ष्टाव॑ष्टौ॥२१॥

कृ॒त्वोऽभि॑षु॒त्यं ब्र॒ह्म॒वा॒दि॒नो व॑दन्ति प॒वित्र॑व॒न्तोऽन्ये॑ ग्र॒हा  
गृ॒ह्यन्ते॑ कि॒म्पवि॑त्र उपा॒ः शु॒रिति॒ वाक्प॑वि॒त्र इति॑ ब्रू॒यात्  
वा॒चस्प॑तये प॒वस्व॒ वाजि॑त्रि॒त्याह॒ वाचै॑वैन॒म्पव॑यति वृ॒ष्णो  
अ॒ः शु॒भ्या॒मित्या॑ह वृ॒ष्णो ह्ये॒ताव॑ः शू यौ सोम॑स्य॒ गर्भ॑स्ति॒पूत॒



इत्या॑ह॒ गभ॑स्तिना॒ ह्ये॑नम्प॒वय॑ति दे॒वो दे॒वानां॑ प॒वित्र॑म॒सीत्या॑ह  
दे॒वो ह्ये॑षः॥ २२॥

सं दे॒वानां॑ प॒वित्रं॑ ये॒षां भा॒गोऽसि॑ तेभ्य॒स्त्वेत्या॑ह  
ये॒षां ह्ये॑ष भा॒गस्तेभ्य॑ ए॒नं गृ॒ह्णाति॑ स्वा॒कृतो॑ऽसीत्या॑ह  
प्रा॒णमे॒व स्वम॑कृत॒ मधु॑मतीर्न॒ इष॑स्कृ॒धीत्या॑ह सर्व॑मे॒वास्मा॑  
इ॒दं स्व॑दयति॒ विश्वे॑भ्य॒स्त्वेन्द्रि॑येभ्यो॒ दि॒व्येभ्यः॑ पार्थि॑वेभ्य॒  
इत्या॑होभये॒ष्वेव॑ दे॒वमनु॑ष्येषु॒ प्रा॒णान्द॑धाति॒ मन॑स्त्वा॥ २३॥

अ॒द्वित्या॑ह॒ मन॑ ए॒वाश्नु॑त उ॒र्वन्तरि॑क्षमन्वि॒हीत्या॑हान्तरि॒क्षदे॒व  
हि प्रा॒णः स्वाहा॑ त्वा सु॒भ॒वः सूर्या॑येत्या॑ह प्रा॒णा वै  
स्वभ॑वसो दे॒वास्तेष्वे॒व प॒रोक्षं॑ जुहोति॒ दे॒वेभ्य॑स्त्वा  
म॒रीचि॑पेभ्य॒ इत्या॑हादित्यस्य॒ वै र॒श्मयो॑ दे॒वा म॒रीचि॑पास्तेषां  
तद्भा॑ग॒धेय॒न्ताने॒व तेन॑ प्रीणाति॒ यदि॑ का॒मये॑त॒ वर्षु॑कः  
प॒र्जन्यः॑॥ २४॥

स्या॒दिति॑ नीचा॒ हस्ते॑न॒ नि मृ॑ज्या॒द्वृष्टि॑मे॒व नि  
य॑च्छति॒ यदि॑ का॒मये॑ताव॒र्षुकः॑ स्या॒दित्यु॑त्ताने॒न नि  
मृ॑ज्या॒द्वृष्टि॑मे॒वोद्य॑च्छति॒ यद्य॑भि॒चरे॑द॒मुं ज॒ह्यथ॑ त्वा  
हो॒ष्यामी॑ति॒ ब्रू॒यादा॑हु॒तिमे॒वैन॑म्प्रे॒प्सन् ह॑न्ति॒ यदि॑

दूरे स्यादा तमितोस्तिष्ठेत्प्राणमेवास्यानुगत्य हन्ति  
यद्यभिचरेदमुष्य ॥ २५ ॥

त्वा प्राणे सादयामीति सादयेदसन्नो वै प्राणः  
प्राणमेवास्य सादयति षड्भिरंशुभिः पवयति षड्वा ऋतव  
ऋतुभिरेवैनम्पवयति त्रिः पवयति त्रयं इमे लोका एभिरेवैनं  
लोकैः पवयति ब्रह्मवादिनो वदन्ति कस्मात्सत्यात्रयः  
पशूनां हस्तादाना इति यत्रिरुपांशु हस्तेन विगृह्णाति  
तस्मात्रयः पशूनां हस्तादानाः पुरुषो हस्ती मर्कटः ॥ २६ ॥

माध्यन्दिनमृष्टावष्टावेष मनस्त्वा पर्जन्योऽमुष्य पुरुषो द्वे च ॥ ५ ॥ ————— [५]

देवा वै यद्यज्ञेऽकुर्वत तदसुरा अकुर्वत ते  
देवा उपांशौ यज्ञं सः स्थाप्यमपश्यन्तमुपांशौ  
समंस्थापयन्तेऽसुरा वज्रमुद्यत्य देवानभ्यायन्त ते  
देवा बिभ्यन्त इन्द्रमुपाधावन्तानिन्द्रोऽन्तर्यामेणान्तरधत्त  
तदन्तर्यामस्यान्तर्यामत्वम् यदन्तर्यामो गृह्यते भ्रातृव्यानेव  
तद्यजमानोऽन्तर्धत्तेऽन्तस्ते ॥ २७ ॥

दधामि द्यावापृथिवी अन्तरुर्वन्तरिक्षमित्याहैभिरेव  
लोकैर्यजमानो भ्रातृव्यानन्तर्धत्ते ते देवा अमन्यन्तेन्द्रो वा

इदमभूद्यद्वयं स्म इति तै॥ऽब्रुवन्मघवन्ननु न आ भजेति  
सजोषा देवैरवरैः परैश्चेत्यब्रवीद्ये चैव देवाः परे ये चावरे  
तानुभयान्॥ २८ ॥

अन्वाभजत्सजोषा देवैरवरैः परैश्चेत्याह ये चैव देवाः परे  
य चावरे तानुभयान् अन्वाभजत्यन्तर्यामे मघवन्मादयस्वेत्याह  
यज्ञादेव यजमानं नान्तरेत्युपयामगृहीतोऽसीत्याहापानस्य  
धृत्यै यदुभावपवित्रौ गृह्येयातां प्राणमपानोऽनु न्यृच्छेत्प्रमायुकः  
स्यात्पवित्रवानन्तर्यामो गृह्यते॥ २९ ॥

प्राणापानयोर्विधृत्यै प्राणापानौ वा एतौ यदुपांश्चन्तर्यामौ  
व्यान उपांश्शुसवनो यं कामयेत प्रमायुकः स्यादित्यसंस्पृष्टौ  
तस्य सादयेद्व्यानेनैवास्य प्राणापानौ वि च्छिनत्ति  
ताजक्प्रमीयते यं कामयेत सर्वमायुरिरयादिति संस्पृष्टौ  
तस्य सादयेद्व्यानेनैवास्य प्राणापानौ सं तनोति  
सर्वमायुरेति॥ ३० ॥

त उभयान्गृह्यते चतुश्चत्वारिंशच्च॥ ६ ॥

[६]

वाग्वा एषा यदैन्द्रवायवो यदैन्द्रवायवाग्रा ग्रहा गृह्यन्ते  
वाचमेवानु प्र यन्ति वायुं देवा अब्रुवन्त्सोमं राजानं

हना॒मेति॒ सोऽब्रवी॑द्वरं वृणै॒ मद॑ग्रा ए॒व वो॒ ग्रहा॑ गृह्यान्ता॒ इति॒  
तस्मा॑दैन्द्रवाय॒वाग्रा॒ ग्रहा॑ गृह्यन्ते॒ तम॑घ्नन्त्सोऽपू॒यत् तं दे॒वा  
नोपा॑धृष्णुवन्ते वा॒युम॑ब्रुवन्निमं नः स्वदय॥ ३१॥

इति॒ सोऽब्रवी॑द्वरं वृणै॒ मद्दे॒वत्या॑न्ये॒व वः॒ पात्रा॑ण्युच्यान्ता॒  
इति॒ तस्मा॑न्नानादे॒वत्या॑नि सन्ति॒ वाय॑व्या॒न्युच्य॑न्ते॒ तमे॑भ्यो  
वा॒युरे॒वास्व॑दय॒त्तस्मा॑द्यत्पू॒यति॒ तत्प्र॑वा॒ते वि ष॑जन्ति वा॒युर॑हि  
तस्य॑ पवयि॒ता स्व॑दयि॒ता तस्य॑ वि॒ग्रह॑णं नावि॑न्दन्त्सा-  
ऽदि॑तिरब्रवी॑द्वरं वृणा॒ अथ॒ मया॒ वि गृ॑हीध्वम्मद्दे॒वत्या॑ ए॒व  
वः सोमाः॑॥ ३२॥

स॒न्ना अ॑स॒न्नित्यु॑पया॒मगृ॑हीतोऽसीत्या॑हादि॒तिदे॒वत्या॑स्तेन॒  
यानि॑ हि दा॒रुम॑याणि॒ पात्रा॑ण्यस्यै तानि॒ योनेः॑ सम्भू॑तानि॒  
यानि॑ मृ॒न्मया॑नि सा॒क्षात्तान्य॑स्यै तस्मा॑दे॒वमा॑ह॒ वाग्वै॑  
परा॒च्यव्या॑कृतावद॒त्ते दे॒वा इन्द्र॑मब्रुवन्निमां नो॒ वाचं॑  
व्याकु॑र्विति॒ सोऽब्रवी॑द्वरं वृणै॒ मह्यं॑ चै॒वैष वा॒यवे॑ च स॒ह  
गृ॑ह्याता॒ इति॒ तस्मा॑दैन्द्रवाय॒वः स॒ह गृ॑ह्यते॒ तामिन्द्रो॑  
मध्य॑तोऽव॒क्रम्य॒ व्याक॑रोत्तस्मा॑दि॒यं व्याकृ॑ता॒ वागु॑द्यते॒  
तस्मा॑त्स॒कृदिन्द्रा॑य मध्य॒तो गृ॑ह्यते॒ द्विर्वा॑यवे॒ द्वौ हि स॑

वराववृणीत॥ ३३ ॥

स्वदय सोमः सुहाष्टाविंशतिश्च॥ ७ ॥ [७]

मित्रं देवा अंब्रुवन्त्सोमं राजानं हनामेति सो-  
ऽब्रवीन्नाहं सर्वस्य वा अहमित्रमस्मीति तमंब्रुवन्  
हनामैवेति सोऽब्रवीद्वरं वृणै पयंसैव मे सोमं श्रीणन्निति  
तस्मान्मैत्रावरुणमपयंसा श्रीणन्ति तस्मात्पशवोऽपाक्रामन्  
मित्रः सन्क्रूरमकरिति क्रूरमिव खलु वा एषः॥ ३४ ॥

करोति यः सोमेन यजते तस्मात्पशवोऽप क्रामन्ति  
यन्मैत्रावरुणमपयंसा श्रीणाति पशुभिरेव तन्मित्रं संमर्धयति  
पशुभिर्यजमानम्पुरा खलु वावैवमित्रोऽवेदप मत्क्रूरं चक्रुषः  
पशवः क्रमिष्यन्तीति तस्मादेवमवृणीत वरुणं देवा  
अंब्रुवन्त्वयांशभुवा सोमं राजानं हनामेति सोऽब्रवीद्वरं  
वृणै मह्यं च॥ ३५ ॥

एवैष मित्राय च सह गृह्याता इति तस्मान्मैत्रावरुणः  
सह गृह्यते तस्माद्राज्ञा राजानमंशभुवा घ्नन्ति वैश्येन  
वैश्यं शूद्रेण शूद्रन्न वा इदं दिवा न नक्तमासीदव्यावृत्तन्ते  
देवा मित्रावरुणावब्रुवन्निदं नो वि वासयतमिति तावंब्रूतां

वरं वृणावहा॒ एकं॑ ए॒वावत्पूर्वो॑ ग्र॒हो॑ ग्र॒हो गृह्याता॒ इति॑  
 तस्मा॑दैन्द्रवायवः॒ पूर्वो॑ मै॒त्रावरु॑णाद्गृह्यते प्रा॒णापा॒नौ ह्येतौ॑  
 यदु॑पा॒श्वन्तर्या॑मौ मि॒त्रोऽह॑रज॒नय॑द्वरु॒णो रा॒त्रिन्ततो॑ वा इ॒दं  
 व्यौच्छ॑द्यन्मै॒त्रावरु॑णो गृह्यते व्यु॒ष्ट्यै॑ ॥ ३६ ॥

एष चैन्द्रवायवो द्वाविंशतिश्च ॥ ८ ॥ [८]

य॒ज्ञस्य॑ शिरो॑ऽच्छिद्यत॒ ते दे॒वा अ॒श्विना॑वब्रुवन्भि॒षजौ॑ वै  
 स्थं इ॒दं य॒ज्ञस्य॑ शि॒रः प्र॑ति॒ धत्त॑मिति॒ ताव॑ब्रूतां वरं वृणावहै  
 ग्र॒हं ए॒व ना॒वत्रा॑पि गृह्यता॒मिति॑ ताभ्या॑मे॒तमा॑श्विनम॑गृह्णन्ततो॒  
 वै तौ य॒ज्ञस्य॑ शि॒रः प्र॑त्य॒धत्ता॑म् यदा॑श्विनो गृह्यते य॒ज्ञस्य॑  
 निष्कृ॑त्यै तौ दे॒वा अ॑ब्रुवन्प्र॒पूतौ॑ वा इ॒मौ म॑नुष्यच॒रौ ॥ ३७ ॥

भिष॒जावि॑ति॒ तस्मा॑द्वाह्म॒णेन॑ भेष॒जं न का॒र्यम॑पू॒तो  
 ह्ये ३ षोऽमे॒ध्यो यो भिष॑क्तौ ब॒हिष्प॑वमा॒नेन॑ पवयित्वा  
 ताभ्या॑मे॒तमा॑श्विनम॑गृह्णन्तस्मा॑द्ब॒हिष्प॑वमा॒ने स्तु॒त आ॑श्विनो  
 गृह्यते॒ तस्मा॑दे॒वं वि॒दुषा॑ ब॒हिष्प॑वमा॒न उ॑प॒सद्यः॑ पवि॒त्रं  
 वै ब॒हिष्प॑वमा॒न आ॒त्मान॑मे॒व प॑वयते॒ तयो॑स्त्रेधा  
 भेष॑ज्यं वि न्य॒दधु॑र॒ग्नौ तृ॑तीयम॒प्सु तृ॑तीयम॒ब्राह्म॑णे  
 तृ॒तीय॑न्तस्मा॑दुदपा॒त्रम् ॥ ३८ ॥

उ॒प॒नि॒धाय॑ ब्रा॒ह्म॒णं दक्षि॑ण॒तो नि॒षाद्य॑ भे॒ष॒जं कु॑र्या॒द्याव॑दे॒व  
 भे॒ष॒जं तेन॑ करोति स॒म॒र्धुक॑मस्य कृ॒त॒म्भ॑वति ब्र॒ह्म॒वा॒दिनो॑  
 वदन्ति॒ कस्मा॑त्स॒त्यादे॑कपात्रा द्विदे॒व॒त्या गृ॑ह्यन्ते॑ द्विपात्रा  
 हूयन्त॒ इति॒ यदे॑कपात्रा गृह्यन्ते॒ तस्मा॑दे॒कोऽन्त॑र॒तः प्रा॒णो  
 द्विपात्रा॑ हूयन्ते॒ तस्मा॑द्द्वौ॒द्वौ ब॒हि॒ष्ठा॑त्प्रा॒णाः प्रा॒णा वा  
 ए॒ते यद्वि॑दे॒व॒त्याः प॒शव॑ इडा॒ यदि॑डा॒म्पूर्वा॑ द्विदे॒व॒त्येभ्य॑  
 उप॒ह्वये॑त॥ ३९॥

प॒शुभिः॑ प्रा॒णान॒न्तर्द॑धीत प्र॒मायु॑कः स्याद्विदे॒व॒त्या॑न्भक्षयित्वेडा  
 ह्वयते॒ प्रा॒णाने॒वात्म॑न्धित्वा प॒शूनुप॑ ह्वयते॒ वाग्वा  
 ऐ॒न्द्रवा॒यवश्चक्षु॑र्मै॒त्रावरु॑णः श्रोत्र॑मा॒श्विनः॑ पु॒रस्ता॑दै॒न्द्रवा॒यव॑म्भक्षय  
 तस्मा॑त्पु॒रस्ता॑द्वा॒चा व॑दति पु॒रस्ता॑न्मै॒त्रावरु॑णं तस्मा॑त्पु॒रस्ता॑च्चक्षु॑  
 पश्यति॒ सर्व॑तः परि॒हार॑मा॒श्विनं॑ तस्मा॑त्सर्व॒तः श्रोत्रे॑ण शृ॒णोति॑  
 प्रा॒णा वा ए॒ते यद्वि॑दे॒व॒त्याः॥ ४०॥

अ॒रि॒क्तानि॑ पात्राणि सादयति॒ तस्मा॑द॒रि॒क्ता अन्त॑र॒तः  
 प्रा॒णा यतः॑ खलु॒ वै य॒ज्ञस्य॑ वि॒त॑तस्य॒ न क्रि॑यते॒ तदनु॑  
 य॒ज्ञ९ रक्षा॑९स्य॒व च॑रन्ति॒ यद॑रि॒क्तानि॑ पात्राणि सादयति॒  
 क्रि॒यमा॑णमे॒व तद्य॒ज्ञस्य॑ शये॒ रक्ष॑साम॒नन्व॑वचाराय॒ दक्षि॑णस्य

हवि॒र्धान॒स्योत्तर॑स्यां वर्त॒न्याः सा॑दयति वा॒च्यैव वाचं॑  
दधा॒त्या तृ॑तीयसव॒नात्परि॑ शेरे य॒ज्ञस्य॑ संत॒त्यै॥४१॥

मनु॒ष्य॒चरा॒वु॒दपा॒त्रमु॒पहृ॑येत द्विदे॒वत्याः॑ षड्व॒त्वारि॑ः श॒च्च॥९॥ [९]

बृह॒स्पति॑र्दे॒वानां॑ पु॒रोहि॑त॒ आसी॒च्छण्डा॒मर्का॑वसु॒राणां॑  
ब्रह्म॑ण्वन्तो दे॒वा आस॒न्ब्रह्म॑ण्वन्तोऽसु॒रास्ते ३ऽन्यो॑न्यं  
नाश॑कृवन्नभि॒भवि॑तुन्ते दे॒वाः शण्डा॒मर्का॑वुपा॒मन्न॑यन्त॒  
ताव॑ब्रूतां वरं वृणावहै ग्रहा॑वेव ना॒वत्रा॑पि गृह्येता॒मिति॑  
ताभ्या॑मेतौ शुक्रा॒मन्थिना॑वगृह्णन्तौ दे॒वा अभ॑वन्परासु॒रा  
यस्यै॒वं वि॒दुषः॑ शुक्रा॒मन्थिनौ॑ गृह्येते भव॑त्या॒त्मना॒ परा॑॥४२॥

अ॒स्य भ्रातृ॑व्यो भवति॒ तौ दे॒वा अ॑प॒नुद्या॒त्मन॒  
इन्द्रा॑याजुहवुरप॒नुत्तौ॑ शण्डा॒मर्कौ॑ स॒हामु॑नेति ब्रूया॒द्यं  
द्वि॒ष्याद्यमे॒व द्वेष्टि॑ तेनैनौ स॒हाप॑ नुदते स प्रथ॑मः  
संकृ॑तिर्वि॒श्वकर्मे॒त्येवैना॑वा॒त्मन॒ इन्द्रा॑याजुहवुरिन्द्रो ह्ये॒तानि॑  
रूपा॑णि करि॑कृदचरद॒सौ वा आ॑दित्यः शुक्रश्चन्द्रमा॑  
मन्थ्य॑पिगृह्य प्राश्चौ निः॥४३॥

क्रा॒म॒त॒स्तस्मा॑त्प्राश्चौ यन्तौ न पश्यन्ति प्र॒त्यश्चा॑वावृ॒त्य  
जुह॑त॒स्तस्मा॑त्प्र॒त्यश्चौ॑ यन्तौ पश्यन्ति चक्षु॑षी वा ए॒ते



य॒ज्ञस्य॒ यच्छु॒क्राम॒न्थिनौ॒ नासि॑कोत्तरवेदि॒रभितः॑ परि॒क्रम्य॑  
 जुहु॒तस्तस्मा॑द॒भितो॒ नासि॑कां चक्षु॒षी तस्मान्नासि॑कया  
 चक्षु॒षी वि॒धृते॒ सर्व॑तः परि॒ क्राम॑तो रक्ष॒साम॑प॒हृत्यै॒ देवा वै  
 याः प्राची॒राहु॑ती॒रजु॑हवुर्ये पुर॒स्ताद॑सुरा आस॒न्ताः स्ताभिः॑  
 प्र॥ ४४ ॥

अ॒नुद॒न्त याः प्र॒तीची॒र्ये प॒श्चाद॑सुरा आस॒न्ताः स्ताभि॑रपा॒नुदन्त  
 प्राची॑र॒न्या आहु॑तयो हूयन्ते॑ प्र॒त्यश्चौ॑ शु॒क्राम॒न्थिनौ॒ पश्चाच्चै॒व  
 पुर॒स्ताच्च॑ यज॑मानो भ्रातृ॒व्यान्प्र णु॑दते॒ तस्मात्परा॑चीः प्र॒जाः  
 प्र वी॑यन्ते प्र॒तीची॑र्जायन्ते शु॒क्राम॒न्थिनौ॒ वा अनु॑ प्र॒जाः प्र  
 जा॑यन्तेऽत्रीश्चाद्या॑श्च सु॒वीराः॑ प्र॒जाः प्र॑ज॒नय॑न्परी॒हि शुक्रः॑  
 शुक्र॑शोचिषा॥ ४५ ॥

सुप्र॒जाः प्र॒जाः प्र॑ज॒नय॑न्परी॒हि म॒न्थी म॒न्थिशो॑चिषेत्या॒हैता  
 वै सु॒वीरा॒ या अ॒त्रीरे॒ताः सु॑प्र॒जा या आ॒द्या य ए॒वं वेदा॒त्र्यस्य॑  
 प्र॒जा जा॑यते नाद्या॑ प्र॒जाप॑तेरक्ष्य॒श्वय॑त्त॒त्परा॑प॒त॒त्तद्वि॑क॒ङ्क॒तम्प्रावि॑  
 नार॑म॒त् तद्य॑व॒म्प्रावि॑श॒त् तद्य॑वेऽर॒म॒त् तद्य॑व॒स्य॥ ४६ ॥

य॒वत्वं यद्वैक॑ङ्क॒तम्म॒न्थिपा॒त्रम्भ॑वति॒ सक्तु॑भिः श्री॒णाति॑  
 प्र॒जाप॑तेरे॒व तच्चक्षुः॑ सम्भ॑रति ब्र॒ह्मवा॑दिनो॒ वद॑न्ति॒

कस्मात्सत्यान्मन्थिपात्रं सदो नाश्रुत इत्यार्तपात्रं हीति  
ब्रूयाद्यदश्रुवीतान्धोऽध्वर्युः स्यादार्तिमाच्छेत्तस्मान्नाश्रुते॥ ४७ ॥

आत्मना परा निष्प्र शुक्रशोचिषा यवस्य सप्तत्रिंशच्च॥ 10 ॥ ————— [१०]

देवा वै यद्यज्ञेऽकुर्वत तदसुरा अकुर्वत ते  
देवा आग्रयणाग्रान्ग्रहानपश्यन्तानगृह्णत ततो वै ते-  
ऽग्रम्पर्यायन् यस्यैवं विदुष आग्रयणाग्रा ग्रहा गृह्यन्ते-  
ऽग्रमेव समानानाम्पर्येति रुग्णवत्यर्चा भ्रातृव्यवतो  
गृहीयाद्भ्रातृव्यस्यैव रुक्ताग्रं समानानाम्पर्येति ये देवा  
दिव्येकादश स्थेत्याह॥ ४८ ॥

एतावतीर्वै देवतास्ताभ्य एवैनं सर्वाभ्यो गृह्णात्येष ते  
योनिर्विश्वेभ्यस्त्वा देवेभ्य इत्याह वैश्वदेवो ह्येष देवतया वाग्वै  
देवेभ्योऽपक्रामद्यज्ञायातिष्ठमाना ते देवा वाच्यपक्रान्तायां  
तूष्णीं ग्रहानगृह्णत साऽमन्यत वागन्तर्यन्ति वै मेति  
साग्रयणम्प्रत्यागच्छत्तदाग्रयणस्याग्रयणत्वम्॥ ४९ ॥

तस्मादाग्रयणे वाग्वि संज्यते यत्तूष्णीम्पूर्वे ग्रहा  
गृह्यन्ते यथा थसारीयति म आख इयति नाप  
राथस्यामीत्युपावसृजत्येवमेव तदध्वर्युराग्रयणं गृहीत्वा

य॒ज्ञमा॒रभ्य॒ वाचं॒ वि सृ॑जते॒ त्रिर्हि॑ क॒रोत्यु॒द्गातृ॑ने॒व तद्वृ॑णीते  
प्र॒जाप॑ति॒र्वा ए॒ष यदा॑ग्रय॒णो यदा॑ग्रय॒णं गृ॑हीत्वा हिं॒करोति॑  
प्र॒जाप॑तिरे॒व॥५०॥

तत्प्र॒जा अ॒भि जि॑घ्रति॒ तस्मा॑द्व॒थ्सं जा॒तं गौ॒रभि॑  
जि॑घ्रत्या॒त्मा वा ए॒ष य॒ज्ञस्य॒ यदा॑ग्रय॒णः स॒र्वने॑स॒वने॒ऽभि  
गृ॑ह्णात्या॒त्मन्ने॒व य॒ज्ञः सं त॑नोत्यु॒परि॑ष्टा॒दा न॑यति॒ रेतं॑  
ए॒व तद्व॑धात्य॒धस्ता॒दुप॑ गृह्णाति॒ प्र ज॑नयत्ये॒व तद्व॑ह्मवा॒दिनो॑  
वदन्ति॒ कस्मा॑त्स॒त्याद्गा॑य॒त्री कनि॑ष्ठा॒ छन्द॑सा॒ऽसुती॑ सर्वा॒णि  
स॒र्वना॑नि व॒हती॑त्येष॒ वै गा॑यत्रि॒यै व॒थ्सो यदा॑ग्रय॒णस्तमे॒व  
तद॑भिनि॒वर्त॑ः॒ सर्वा॑णि॒ स॒र्वना॑नि व॒हति॒ तस्मा॑द्व॒थ्सम॒पाकृ॑तं  
गौ॒रभि॑ नि॒वर्तते॑॥५१॥

आहा॒ग्रय॒णत्वं प्र॒जाप॑तिरे॒वेति॑ वि॒शति॑श्च॥११॥ [११]

इन्द्रो॑ वृ॒त्राया॒युर्वै य॒ज्ञेन॑ सु॒वर्गायेन्द्रो॑ म॒रुद्वि॑रदि॒तिरन्तर्या॑मपा॒त्रेण॑ प्रा॒ण उ॑पा॒शुपा॑त्रे॒न्द्रो  
वृ॒त्रम॑हन्तस्य॒ ग्रहान्॒ वै प्रा॒न्या॒न्येका॑दश॥११॥ इन्द्रो॑ वृ॒त्राय॒ पुन॑र्ऋतुना॒ह मि॒थुन॑म्प॒शवो॑ नेष्टः  
प॒र्लो॑मुपा॒श्वन्तर्या॑मयो॒द्विच॑त्वारि॒शत्॥४२॥ इन्द्रो॑ वृ॒त्राय॑ पा॒ङ्कत्व॑म्॥ [१२]

This PDF was downloaded from <http://stotrasamhita.github.io>.

GitHub: <http://stotrasamhita.github.io> | <http://github.com/stotrasamhita>

Credits: <http://stotrasamhita.github.io/about/>